



Pou Piblikasyon Imedya: 23/05/2023

GOUVÈNÈ KATHY HOCHUL

GOUVÈNÈ HOCHUL ANONSE INOGIRASYON POU NOUVO SANT SÈVIS POU SANZABRI KI KOUTE 13.9 MILYON DOLA NAN KONTE ONONDAGA

Devlopman an gen ladan abri ijans pou sanzabri ki deplase ak uit inite lojman sipò pèmanan

Pwogram Lojman ak Asistans pou Sanzabri Eta a bay 7.1 milyon dola nan finansman kapital eta a

Gouvènè Kathy Hochul te anonse jodi a inogirasyon nouvo Sant Sèvis Lojman Catholic Charities nan Konte Onondaga. Devlopman 13.9 milyon dola nan Syracuse la gen ladan yon abri ijans pou gason ki gen 80 kabann, uit nouvo inite kay sipò pèmanan, ak sèvis sante ak sante mantal sou plas.

"Nouvo sant sa a pral ede satisfè bezwen kominate a epi adrese pwoblèm sanzabri nan Syracuse ak zòn ki alantou a lè li ofri kabann ijans ak lojman pèmanan, avèk sèvis konplè ki disponib pou rezidan yo", **Gouvènè Hochul te deklare**. "Pwojè tankou sa a pral pèmèt nou atake kriz lojman an dirèkteman pou Nouyòkè ki nan bezwen yo epi mete yo sou wout endepandans ak siksè".

Sant Sèvis Lojman Catholic Charities nan Konte Onondaga a fè pati plan lojman global 25 milya dola Gouvènè Hochul la ki pral kreye oswa prezève 100,000 kay abòdab atravè Eta New York, ki gen ladan 10,000 kay ki gen sèvis sipò pou popilasyon vilnerab yo, plis elektrifikasyon yon lòt 50,000 kay.

Sant Sèvis Lojman an te enplike reyabilitasyon yon biling komèsyal ak nouvo konstriksyon. Kanpis la, ki sitiye nan Erie Boulevard East, te ranplase ansyen abri pou gason Catholic Charities la, ki sitiye nan South Clinton Street. Yo te vann lokal ansyen abri a bay JMA Wireless pou ankouraje devlopman biznis nan Syracuse.

Abri pou gason 24/24, 7/7, ke Biwo Asistans Tanporè ak Andikap (Office of Temporary and Disability Assistance, OTDA) la sètifye, te ouvri pi bonè nan sezon prentan sa a epi uit apatman lojman sipò yo ta dwe fini byento. Etablisman an gen resous santralize ak sèvis sipò, tankou sèvis medikal ak sante mantal sou plas, yon kwizin komèsyal pou devlopman konpetans ak devlopman mendèv, ak espas biwo pou pwogram yo.

Pwojè sa a te konstwi avèk 7.1 milyon dola ki soti nan Pwogram Lojman ak Asistans pou Sanzabri (Homeless Housing and Assistance Programm, HHAP) a, ke Biwo pou Asistans Tanporè ak Andikap eta a ap jere a. Lòt finansman gouvènman an gen ladan 3 milyon dola ki soti nan yon afektasyon federal, 2.8 milyon dola ki soti nan Konte Onondaga ak 500,000 dola ki soti nan vil Syracuse. Biwo pou Asistans Tanporè ak Andikap Eta New York la ap bay 200,000 dola chak ane nan finansman operasyonèl pou uit inite lojman sipò pèmanan atravè Inisyativ Lojman Sipò Empire State (Empire State Supportive Housing Initiative, ESSI) la.

Komisè Biwo Eta New York pou Asitans Tanporè ak pou Andikap, Daniel W. Tietz, te deklare, "Pou Nouyòkè ki nan sitiyasyon sanzabri yo, abri ijans yo se yon resous enpòtan anpil epi se souvan premye etap sou wout pou mennen nan estabilite lojman. Ak pou anpil fanmi, lojman sipò se zouti ki pi efikas nou genyen pou atenn objektif sa a. Nouvo Sant Sèvis pou Sanzabri a ofri aksè fasil ak sèvis sipò pou moun k ap chèche refij nan lari yo epi pandan y ap fè tranzisyon soti nan abri pou ale nan lojman pèmanan".

Senatè Eta a, Rachel May, te deklare, "Li obligatwa pou tout moun gen yon kote ki an sekirite epi ki bay sipò pou yo viv. Nouvo etablisman Catholic Charities sa a pral sèvi plizyè douzèn gason ki nan sitiyasyon sanzabri, ki bay yon fondasyon kote yo pral resevwa sèvis konplè pou ede yo bati yon avni meyè. Mèsi a Catholic Charities nan Konte Onondaga paske nou te ede sipòte moun ki gen difikilte yo ak Gouvènè Hochul pou sipò w kontinye bay kominote Sant New York la".

Manm Asamble William Magnarelli te deklare, "Devlopman yon nouvo sant sèvis pou sanzabri nan Konte Onondaga se yon apwòch efikas pou ede adrese bezwen yo nan Syracuse ak zòn ki alantou yo. Enklizyon sèvis konplè yo pral bay rezidan yo aksè a sèvis sante ak sante mantal, sa ki pèmèt yo yon apwòch konplè pandan y ap travay pou endepandans yo. Mwen felisite Catholic Charities pou pwojè sa a".

Direktè Egzekitif Catholic Charities nan Konte Onondaga, Michael F. Melara, te deklare, "Sèvi manm kominote nou an ki ap viv yon fason vilherab ak sanzabri reprezante tout ekspresyon misyon nou an. Avèk èd anplwaye ki gen talan ak angaje ak yon bann sipòtè, nou pral akonpli misyon nou nan nouvo etablisman sa a. Mèsi a HHAP Eta New York pou sipò finansye li ak patenarya eksepsyonèl li".

###

Lòt nouvèl disponib sou sit www.governor.ny.gov
Eta New York | Chanm Egzekitif | press.office@exec.ny.gov | 518.474.8418

[ANILE ENSKRIPSYON OU](#)